

及土拉多處，發現卜柯洛克土拉。又此一帶之古墳，與雅爾湖不同，此處塚上雖堆砌石塊，其下即爲井穴，深約四尺許，有木料作欄，死者裹以布帛，或毛織物，疑爲本地後期之遊牧民族，或卽畏兀兒人之墓地，亦未可知。因余欲速返雅爾湖，未及工作，探覓其遺物，殊可惜也。由此向北，復渡托克遜水，轉西北行至大墩子，轉東北行，晚八點四十分抵雅爾湖住次。小侯與汗木多利急以四日之工作相告，古物纍纍，已盈余之牀榻前後左右矣。

插第
一圖

三月十二日，余卽至古墳地視查彼等已往之工作。在大道南之古墳塋，均集中於中部。其西，則爲風蝕土阜，迤邐漫衍。再南，過小道，卽至四道溝。往東，地勢高低不平，古墳散布亦稀。故此一帶卽中部，爲溝西墳塋之要區，亦卽余等工作之中心地也。茲將道南工作情形，分述如左。

九、衛塋。此爲隣近路南最西之一塋，其門均向東北。有墳六塚，分爲三列。余發掘其二。在第一塚，其墓表爲朱書朱格，題延昌三十三年衛孝恭妻袁氏。有陶器四件。第三塚爲一墓誌銘，字迹漫滅，不可盡辨。故死者之姓氏官職及埋葬年月，均無可考。有陶器十一件。第六塚，無墓表，僅得骨器一件，頭尖銳，疑爲婦人之簪。在衛塋之東爲羅塋。石欄作長方形，門亦東北向。共五塚，祇掘其第三塚。墓表爲朱書，題延壽十三年羅妻太景。無陶器。

十、袁塋。在羅塋之東爲袁塋。塚門均東北向。共墳十二塚，掘第一第二兩塚。在第一塚中，有陶器五件，無墓表。